

DES LETTRES

ESCRITES A D'EPERNON,
par Monsieur l'Abbé d'Elbenc.

Monseigneur, l'experience maistresse
des choses, nous faict de iour en iour
cognoistre qu'il n'y a rien de stable &
permanent en ce monde, & à la mienne volon-
té que la preuue n'en fust poinct si claire & eui-
dente qu'elle est en la mort du plus grand Roy
& Monarque de la Chrestienté, cela est plein de
merueille, que ceint & enuironné de tant de
milliers d'hommes il ait receu le coup mortel
par vn simple moyne, la resolution duquel luy
auoit esté des-auparauant descouuerte, comme
vous sçauiez : & neantmoins sciemment s'est-il
laissé choir en la fosse, qu'il preparoit pour les
autres: qui me faict confesser ingenuement, que
ie ne pense iamais à ceste estrange & inopinée
aduenture, que quant & quant, ie ne sois espris
en moy-mesme d'une iuste crainte de l'ire de
Dieu, aussi choisir que tout homme qui aura
tant soit peu de conscience, sera contrainct de
recognoistre en ce faict la trace du iugement
inscrutable du souuerain, & aduoüer franche-
ment, fil ne veut comme on dict regimber con-
tre l'eguillon, & s'opiniastrer d'un obstiné cou-
rage contre sa propre conscience, ce party estre

le meilleur, que Dieu à voulu ayder si extraordinairement. Et bien que du viuant du Roy on peut dire qu'il y auoit quelque doubte en la cause, d'autant que chacun costé se pouuoit soustenir le meilleur, & qu'il sembloit que les vns & les autres ne desirassent que la conseruation du public, & le soulagement du Royaume, si est-ce que maintenant il faut iuger pour celuy que Dieu a si opportunément fauorisé. Mais Monseigneur, ie veux bien vous protester, que ie ne prendrois pas la hardiesse d'entrer si auant au discours de telles affaires, si ie ne m'asseurois de la foy & Religion Catholique de celuy auquel i'escriis, & me garderois bien de vous decouurir l'interieur de mes pensees, si ie n'estimois qu'il ne vous sera moleste & desagreable, en prenant ce subiect pour argument de la presente: laquelle ne téd à autre fin que de pouuoir trouuer comme ie dois, vn bon & profitable conseil, tant pour le repos de vostre conscience, que pour la conseruation de vostre auctorité & grandeur: ce que ie feray, Dieu aydant, si il vous plaist me faire ce bien de m'excuser, si ceste-cy vous parle vn peu plus librement que les precedentes. Je vous diray doncques, que puisque vous auez eu deuant voz yeux vn si pireux spectacle que de voir priué de vie celuy que vous eussiez mille fois désiré qu'il vous suruescust, il reste que tandiz qu'auuez le temps, & que le Seigneur retarde pour encore d'estendre sur vous

le bras de sa seuerẽ vengeance, vous vous acheminez à la voye de salut, & destourniez les effects de son courroux, qu'il est prest à décocher, si vostre conuersion ne l'en retire. A la verité il vous attend à penitence, & vous tend les bras, ainsi que la piteuse mere qui tasche de secourir & sauuer l'enfant qu'elle a si cherement & tendrement nourry, lors qu'elle le voit en danger d'estre submergé sous les flots impetueux des ondes. Et comme vous auez couru à offencer sa diuine Majesté, ainsi semble-il maintenant qu'il vole à vous faire grace, en vous admonestant par la punition qu'il faict des autres, de vostre deuoir, & qu'il vous en pend autant sur la teste, si vous ne recognoissez voz fautes, & ne venez à amendement de vostre vie, auquel pour paruenir vous deuez vous monstrier au dedans tel, qu'en apparece exterieure ie vous ay tousiours iugé, c'est à sçauoir & Chrestien & Catholique & faire que comme Dieu vous a conserué en vn moment plus de biẽs qu'à nul autre du Royaume, le Roy defunct en ayant esté l'instrument pour les vous dispenser, vous soyez veu le premier à embrasser à bon escient & sans feintise la sainte querelle, & autant que par-cy-deuant vous auez peut estre faict le retif, pour quelques considerations temporelles, à soustenir & fauoriser la cause de la Religion que voz ancestres vous ont si curieusement conseruée: à ceste heure que Dieu vous y conuie, hastez vous, avec vn

zele ardent & vrayement deuot, de prendre en main en tant qu'en vous est, la tuition & defence d'icelle. Je sçay que voz moyens ne sont pas petits, si vous auez enuie de les employer au seruice de Dieu & de l'Eglise, & que vous pouuez beaucoup pour la cause, si tant est que vouliez empescher & destourner le cours du venin de l'heresie, qui petit à petit se veut escouler par tout le corps de la France. C'est làc'est là, le bût, ou vous deuez faire tendre toutes voz actions & comportements, & par ce moyen faire valoir le talent que Dieu a mis chez vous comme en depost, tandis que le temps & l'occasion se presente: car il le vous redemandera avec ysure, & viendra comme le larron en la nuit, alors que moins vous y penserez: Faiçtes donc par actes valeureux à l'honneur de Dieu, à l'exaltation de la religion, & au salut de vostre chere patrie, qui vous a si delicatement esleué, que les dons que Dieu vous a conferez, soient cōme l'eschelle pour vous faire monter, apres le pelerinage acheué de ceste passagere vie, par dessus les astres brillants du doré firmament pour la iouyr avec la troupe bien-heureuse des ames celestes du sacré fruiçt du repoz perdurable, promis à ceux qui s'employeront à bien faire en ce monde. Faiçtes que vous soiez veu digne de tant & tant de biēs, dont le ciel vous a prodigalemēt doué: vous pouuez (comme j'ay dit) par auanture beaucoup profiter, non pas, qu'au contraire vous y

puissiez nuire : car les forces humaines ne sont bastantes pour soustenir le choc des forces de Dieu.

Je ne nieray pas que parci deuant vous n'ayez eu quelque couleur d'excuse, de n'vser de réuolte contre vostre Prince, & bien-faicteur, mesmement ayant esté par luy aux estats & honneurs auxquels vous estes : & diray plus, que cōbien qu'il y eut en luy de l'hypocrisie, toutesfois ayant l'apparence extérieure Catholique, certainement vous n'estiez par trop à reprendre, si vous suiuiiez son party : Car vous n'estiez pas le scrurateur de son cœur, c'estoit à Dieu qu'il faisoit barbe de foirre, comme on dit, tant y a qu'il auoit tant d'obligations sur vous, que nécessairement vous le deuiiez suiure, tādiz qu'il faisoit demonstrence de Catholique. Or à present que le masque est leué, & que la verité, qui estoit voilee ce sembloit à ceux qui n'y regardoient de si prest, paroist à descouuert, que nous sçauons bien qu'il faut estre ou tout vn ou tout autre, c'est à dire ou Catholique, ou hereticque (les factions estant depuis n'aguères reduites à ce point sans qu'on y admette de rechef, les autres qui seroient en bon françois hereticques tout à faict) ne fuyons pas l'occasion de bien faire en courant à cloz yeux au precipice de mort, mais de bonne heure cherchons de profiter à plusieurs, certainement plus vaut tard que jamais. Imitons S. Paul, qui conuertit l'eschauf-

fa d'autant plus du zele & amour de Dieu, qu'il n'en estoit auparauant refroidy. C'est humain, disent les Theologiens, que pecher, mais perseuerer au mal sans vouloir entendre à amandement c'est chose diabolique. Dieu nous appelle tous les iours à penitence, nous induit, admoneste, & comme à la recherche de la voye de salut, les afflictions desquelles il nous visite, les verges dōt il nous chastie par fois, ce nous semble, trop aigrement, sont autant de saincts & salutaires aduertissements, pour nous induire à humilité, & à implorer le secours de sa misericorde: les biens & les richesses qu'à foison il espanche sur nous, qu'il faict pleuoir en abondance en noz maisons: sont les semonces & instincts par lesquels il nous faict entendre nostre propre deuoir, en voulant exiger de nous pour tout tribut, vne iuste distributiō enuers les siens en recognoissance de sa liberalité, de laquelle il faut vser en bien, car autrement nous seroit-elle à damnation: Terence, bien que Payen, ne l'a pas ignoré quant il disoit,

» *Les biens font mal à qui des biens abusent:*

» *Les biens font bien aux bons qui bien en vsent.*

Ainsi doncques, puisque par signes si extraordinaires Dieu nous faict voir à l'œil, & toucher au doigt ce que nous deuons suyure, n'ayons pas ie vous prie le cœur frappé d'un endurcissement & obstination. Car de nous enuelopper aux lacs ausquels nous estions tombez, ce seroit

7

faire cōme celuy, qui desespéré aualle le hanap
que luy-mesme auoit remply d'un poison mor-
tifere. Il faudroit bien dire que la fièvre freneti-
que qui nous à si long tēps possédé, auroit mer-
ueilleusemēt degousté & affady le palais de no-
stre bouche, si à present qu'elle est sur le point
de guerir ou de redoubler, nous ne sçauions di-
scerner quelle viāde est la meilleure, pour la re-
stauration de nostre estomac debile & mal sain.

Je diray donc que si vous estes Catholique,
vous ne pouuez suyure autre party que Catho-
licque, autrement serez vous plus punissable,
qui faisant profession de l'heresie tout à fait :
car de prester faueur, confort, & ayde à ceux
que l'Eglise tient pour Ethniques & Payens, &
qu'elle exclut de la sainte cōmunion des fidel-
les, c'est proprement se veautrer au peché tant à
craindre contre le S. Esprit, que Dieu nostre re-
dempteur a prononcé irremiscible & en ce mon-
de & en l'autre, qui n'est autre chose que l'impu-
gnation contre la verité cogneüe. Et non sans
cause disoit ce grand Theodose Empereur, que
ceux qui profanent le S. Sacrement de Baptes-
me, qui ne sont autres que ceux qui soustiennēt
& fauorisent le party contraire à leur religion
foy & creance, se rendent indignes de iouyr du
fructueux remede de la penitence, qu'on a ac-
coustumé de departir à ceux, qui pourroiet estre
entachez de quelques autres crimes. mais quoy?
voyons si nous-mesmes ne confesserons nostre

condamnation : retournons seulement à nous, & souffrons que la verité frappe au marteau de nostre conscience, certainement les remords qui nous viendront d'icelle, nous seront salutaires & profitables, pour prendre le frein aux dēts & nous contraindre de tourner les pas de nostre voyage la où nostre foy & la profession de religion nous induit, autrement nous n'honorions Dieu que des lēures, & aurions du tout le cœur aliené de luy : & qui pis est en nostre ame, nous serions sans ame, c'est à dire semblables à ce pourceau Epicurien qui vouloit l'ame, prit fin & fut esteinte avec ce corruptible corps : mais de cela ailleurs. Cependant la conscience iugera equitablement de ceste controuersé, que si nous allons contre ce qu'elle nous suggerera, faisons estat que nous serons cruciez & tourmentez plus griefuement, que non pas ce geant fils de la terre (c'est à dire qui adonnoit son cœur aux choses terrestres, & se plongeoit aux delices de la chair) que les portes feignent estre continuellement dechiré & despecé au dedans, par vn deuorant vautour. Bref la conscience, au tēsmoignage des anciens mesme,

„ Est vn horrible ver qui viuement rongeur
 „ Guerroye sans relasche au dedans le pecheur.

Ie ne m'arrestera y point d'auantage sur ce subiect, seulement ie vous prieray me permettre de vous proposer deuant les yeux, ce qui est sorty de la bouche de nostre Sauueur. Nul ne

peut (dict-il) seruir à deux maistres, il est impossible que tandis que nous aurons nostre affection au monde, nous puissions auoir le cœur esleué à Dieu. Ainsi tandis que nous nous glifserons parmy les reprocuez, ne pensons pas que nous puissions estre esleuz. Nous ne pouuons estre enfans de Dieu si nous voulons auoir Baal pour pere. Il n'y à rien de commun entre Dieu & le diable: Entre nous & les heretiques il y a autant de separatiō que du plus haut des cieux, au plus bas des enfers. Car le lien de la foy, & de la religion qui nous doit plus estroictement vnir, que non pas les propres liens de parentelle & nous doit d'autant plus attirer à nostre deuoir, que l'ame est excellente par dessus le corps ne les peut comprendre en aucune sorte que ce soit, & nous distinct & separe d'eux comme le bon grain de l'yuraye. En somme nous ne pouuons estre aymez de nostre Dieu, si nous prenons accointance d'eux, & l'Apostre nous en charge de les euitier.

Hé! pour Dieu, que ces particulieres alliances que parauanture nous auons autresfois contracté avec eux, que les obligations temporelles qu'ils pourroient auoir gaigné sur nous, par leurs obsequieux deuoirs & offices enuers nous: ne nous fassent oublier nostre foy, & ne nous esleuent & emmiellent pour tourner nostre bras

contre nostre sainte mere l'Eglise, deschirer & rompre l'vnion, que Iesus-Christ luy mesme allant à la mort pour nous, nous a tant recondamnee. Oublions ie vous prie les iniures qui nous sont faictes, & non pas celles qui sont faictes à Dieu. Qu'aucun respect soit de pere, soit de fils, soit de frere, ne nous empesche que nous ne tenions pour ennemis ceux, ceux dis-ie, qui se declareront ennemis de Dieu & de son espouse. Ainsi nous a-il esté ordonné en l'Euangile, quant il est dict, que ceux qui aymeront plus leurs parents que non pas Dieu, ne seront trouuez dignes de Dieu & d'estre appelez ses enfans. Dieu veut que nous delaiissions toutes choses pour nous ioindre à luy, que nous preferiõs son saint amour à toute affinité & amitié de ce monde, autrement nous nous pouuons bien asseurer, qu'il nous dira ce qu'il dit aux folles vierges, qui n'entrèrent point avec l'Espouse en la chambre nuptiale: ie ne vous cognois point: ie ne scay qui vous estes: vous vous deuiez ranger pour entrer avec voz compagnes, & prédre la liuree de la nopce, ie vous dis de rechef que ie ne vous cognois point. Voyla, Monseigneur, ce que i'auois à deduire, si ie ne me trompe, touchant le repos que vous deuez chercher à vostre conscience, qui a faict iusques icy demonstration d'embrasser la religion Catholique Apostolic-

que & Romaine, & veux bien cōfesser que sans
 ceste marque de foy, que ie voyois luire en vous
 exterieurement, ie ne vous eusse suyuy & ac-
 compagné comme i'ay faict, estât plus astrainct
 que nul autre à fuyr & euter ceux, qui deuient
 de la Foy, à l'occasion de l'onction sacree dont
 Dieu m'a honoré. Mais tandis que vous vous
 tiendrez sur lá planche du nauire de l'Eglise, ie
 vous assisteray autant qu'il me sera possible, &
 au contraire, si vous vous precipitez parmy les
 flots impetueux de l'heresie, vous deuez croire
 que ie seray le premier à vous frapper des armes
 spirituelles, pour empescher que la rage & fu-
 reur de Sathan, rampee chez vous, ne nous en-
 dommage. Je parle vn peu bien hardiment, ie le
 confesse, mais vous sçaurez trop mieux iuger, si
 ce que ie diz ne prend pas son appuy & fonde-
 ment, sur la sacree parole de Dieu. Par ainsi la
 force de la verité me contraignant de declarer
 à mon bien-faicteur, ce que ie voy qui peut pro-
 fiter au salut de son ame, i'vserois de trahison, si
 ie le priuois du fruit d'vne si salutaire doctrine.
 Si ton frere faict mal (dict nostre Dieu) va & le
 repren en secret, entre toy & luy, que s'il ne te
 veut ouyr, prens deux ou trois tesmoins, & en
 leur presence repren le pour la secōde fois, mais
 s'il persiste, & qu'il ne veuille prendre en bonne
 part tes admonitions, bref qu'il ne se corrige

point de son vice, ne feins poinct, dis-le à l'Eglise. Que ceste cy soit dōc vne secrette reprehension entre vous & moy de la faute que vous allez commettre, si vous vous amusez à suyure le party du Roy de Nauarre, & que la crainte que i'ay que vous vous y embourbiez, serue à vous en tirer plustost que ie ne sois nécessité de le rapporter à l'Eglise chrestienne & Catholique.

Non, non, il n'est plus temps de dissimuler & d'auoir le cœur double. Nous voyons, & à nostre grand regret; qu'il y va du faict de la religion. Nous voyons, hélas! nous voyons qu'un heretique veut empieter sur la Couronne, qu'il se veut vendiquer ce qui ne peut estre deu à autre qu'à vn Catholique, qui soit tousiours demeuré ferme en l'Eglise, sans se laisser esbranler aux vents de diuerses doctrines: car ie demanderois volontiers à ceux, qui se targuēt du bouclier de la foy Catholique, & neâtmoins contiennent avec les ennemis iurez d'icelle, si vn membre pourry & dettranché du corps humain peut estre rendu habile pour auoir domination sur tout le corps? Or le Roy de Nauarre estant excommunié manifeste, & par ce moyen deicté, comme vn membre pourry, hors le corps de l'Eglise Catholique, qu'il a taché, & tache tousiours de contaminer, & infecter de son venin, peut-il estre habilité, & rendu digne de

se dire le chef des Catholiques, sous pretexte d'une hypocrisie, où il se précipite à present ainsi n'aduienne. Exposons plustost cent mille vies, si nous les auons, que de souffrir en ignominie de Dieu, qu'un qui ne recognoist Dieu en la sorte que nous le recognoissons, nous seigneurle & tienné en subiection, pour nous faire par après seruir Dieu à sa poste, ainsi qu'il a fait en son pays de Bearn. Mais il viura peut estre doreseuuant a la Catholique, dira quelque disciple de Machiauel, direz vous celuy viure Catholiquement, qui ne se submettra au iugement vniuersel de l'Eglise? S. Paul estant conuert, ne monta-il pas en Ierusalem, pour auoir l'imposition des mains des Apostres, & se soumettre à leur iugement? Que si le Roy de Nauarre se veut reconcilier sans fard à l'Eglise de Dieu, il faut qu'il se prosterne aux pieds de la sainteté, & qu'il recognoisse que l'enormité de ses vices, principalement de l'heresie, l'ont rendu indigne de porter iamais diadème. Luy qui ayant esté vne fois absout, est retourné à son premier vomissement, se peut bien attrédre que sa sainteté, en ensuiuant les saints decretz & anciens canons, le prononcera inhabile de pouoir iamais tenir dignité entre les hommes, & pour satisfactiō de ses abominables pechez, luy ordonnera vne peine perpetuelle condigne à

ses demerites. Car combien que le peché fut remis & pardonné, si est-ce que la peine du moins temporelle y demeure, ainsi que tiennent les Theologiens, quant ce ne seroit que de la priuation de la dignité, afin que la iustice diuine s'exerce eternellement. Que diray-je d'auantage? fil estoit conuertý, deuroit il aspirer d'auoir commandement entre les fídelles? saint Paul ne defend il pas à Timothee, d'ordonner en l'Eglise de Dieu aux dignitez & prelatures les nouueaux conuertiz, de peur qu'ils ne s'enorgueillissent, & qu'ils ne retombent de rechef en la domination de Sathan? Vous voyez donc les obstacles & empeschemēt, qui se rencontrent en la personne de ce Roy, que i'accompare au chien, qu'Aesope & apres luy Alciat disent tenir, sur le riuage de la mer, vn morceau de chair en la gueulle, & l'ayant quitté & abandonné pour prendre, ce luy sembloit, celuy qui luy apparoiſſoit en la mer, se trouua frustré de l'vn & de l'autre, i'entends bien ce que ie dis, pensant s'emparer de l'vn il perdra l'autre si il ne prend garde à luy d'auance bien prest.

Or d'autant que i'ay dit, si bien il m'en ſouuient, au commencement de ceste cy, que pour la conseruation de vostre auctorité & grandeur vous deuiez entrer au party Catholique, m'estant acquitté de ce qui concernoit le repos d'

15
vostre conscience, ie ne puis moins faire que de
toucher vn mot de ce qui appartient à la manu-
tentiõ de voz estats & dignitez. Ouide, & apres
luy vn poëte de ce temps, disoit:

*Qui acquiert faict beaucoup, mais il faict d'auantage
Qui l'ayant bien acquis garde son heritage.*

Sans mettre dõc en ieu que Dieu vous cõfon-
droit, si vous vous attaquez à luy, sondons en
matiere d'affaires d'estat, lequel costé est le plus
asseuré. Nous voyons qu'il n'y a point de cõpa-
raison du petit nõbre d'hetetiques, au nõbre in-
fini de Catholicques: nous voyõs que toutes les
villes tiennēt le party de ceux cy, qu'elles s'vnif-
sent de iour en iour, que tout le plat païs adhère
à eux, & se rége de leur costé, tous les Ecclesiasti-
ques sans exception s'y enfoncent maintenant
plus que iamais, la Noblesse mesme quoy qu'on
vueille dire, delaisse petit à petit le party con-
traire, & se ioinct à eux. Quel port d'assurance
y peut il donc auoir vers le Roy de Nauarre &
ses adherans? les choses y sont reduites au petit
pied, tout s'en va en confusion & sans ordre, la
cherté & famine assaut son camp, enuironne
son armee, les munitions de guerre y defaillent,
les soldats se dissipent, & se vont rendre à ceux
qui leur sont vniz de religion, qui tiennent ia la
campagne à ce qu'on dit en nombre de trente
cinq à quarante mille hommes pour luy faire

teste. Que peut on attendre de là, fuiuant le dis-
 cours humain, sinon qu'une totale ruine du
 foible party du Roy de Nauarre? & ce qui le
 monstre plus euidentement cest le meslange
 qu'on y fait des choses diuines & profanes, &
 l'introduction nouuelle de deux religions pesle-
 mesle qui Huguenot, qui Catholique, qui Ma-
 hometâ, pourueu qu'il n'entre point en la sainte
 Vnion, comme si Dieu ne l'auoit pas enchargee
 pour nous tenir prests à resister aux embusches
 de Sathan. Mais pensez vous que la Noblesse
 Catholique puisse long temps souffrir l'insolence
 des Ministres & Predicants de Geneue? le
 François a ce naturel, qu'au commencement il
 se laisse emporter aux choses nouuelles, mais en
 fin il retourne dont il est venu, il ne nous en
 faut point chercher exemples plus loing, qu'au
 temps que l'heresie pullula en France: en moins
 d'un tourne-main toute la France en fust infe-
 stee, presque tous embrasserent le party du
 Prince de Condé & de l'Admiral, mais qu'ad-
 uint-il? quant on eut decouuert le poison qui e-
 stoit caché sous l'appast mielleux de ces deux
 instrumens de mal, ils furent incontinent aban-
 donnez, en sorte qu'en peu de temps tout se re-
 duist à son premier estat, & n'en seroit plus de
 nouuelles, sans le support qu'on tient leur auoir
 esté presté par le deffunct Roy. Je ne le veux pas
 assurer

assurer, ie ne le sçay que par ouy dire, mais tant y a que puis qu'il haïssoit l'vnion, l'entreprise pour l'extirpation des heresies, comme il la mōstré par effect, il est vray semblable qu'il aymoit l'heresie. Il ne faut donc pas doubter, que par cest estrange mort, leur puissance ne soit de beaucoup diminuee, & que Dieu ne la vueille reduire à neant. Aussi entendons nous icy, que leur armee se dissipe à veuë d'œil, & d'elle mesme s'esbranle & s'esuanoïit par vn secret iugement de Dieu. Que sil se faut ranger des plus forts au dire mesme des Machiauellistes, qui ne voit qu'on ne doit eslire autre party, que des Catholiques vniz?

Mais passons outre, & puisque nous y sommes entrez si auant acquitons nous du reste. Ce que vous auez entendu iusques icy est admirable, mais ce que ie deduiray cy apres est à la verité sur-naturel. Vous sçauetz trop mieux qu'il faut en toutes entreprises regarder la fin, la fin (dis-ie) qui est cause, occasion & suiet de ce que nous proposons, & comme dit Aristote, il n'y a rien qui ne tende & aspire à quelque fin. Poysons donc maintenant, & avec vn meur iugement, sans estre transportez de passions, opposons l'vne & l'autre fin de chasque party, les choses contraires sont tousiours mieux remarquees & paroissent plus clairement mises avec

leurs cōtraires: pour exemple, le blanc iette vne
 plus vifue eftincelle de son blanc, opposé & mis
 contre le noir. La fin donc de ceux qui ont iuré
 l'vnion quelle est elle, sinon de tacher à conser-
 uer la religion receüe de leurs ancestres en son
 entier, sans souffrir qu'elle soit contaminée du
 venin de l'heresie? Et au contraire, la fin des he-
 retiques qu'elle est elle, sinon de se glisser par
 tout le corps du Royaume, estouffer & amortir
 la flamme de la foy, qui reluit & rayonne en
 cores parmy nos François? Mais cecy soit dit en
 faueur des plus clairs-voyants, & qui sçauent
 comme disoit vn ancien, tirer vne bonne con-
 sequence, & solide iugement de ce qui pourroit
 aduenir, par la conference des choses ou passées,
 ou presentes: Du moins au tesmoignage
 des heretiques mesme, endurer deux religions
 & permettre que Dieu soit seruy à double? qu'il
 est autant que vouloir mesler le iour avec la
 nuit, la lumiere avec les tenebres, le chaud avec
 le froid, l'eau avec le feu, en somme vouloir
 faire subsister deux contraires en vn mesme su-
 iet, ce qui ne peut aduenir en nature, au dire
 des Philosophes. Aussi l'espouse de nostre Se-
 gneur Iesus-Christ est vnique, dit l'Ecclesiaste
 que, & ne souffre point de concubine avec elle
 bref elle est sans macule, elle est sans tache, elle
 est toute belle, & trouuee seule digne d'estre

admise en la chambre de l'Espoux, qui la nettoye & purgee de son precieux sang, il a prins en main le brin de l'ysope odorante, pour l'asperger & ondoyer, & luy a donné, pour conduite & sacré flambeau, son saint Esprit, qui l'empesche de chopper, & la meine comme par la main, au liét nuptial de son bien aimé. Or pour reprendre le fil de nos premieres brisees, & retourner au propos que nous auons touché cy dessus, ie veux conclure que quelques seruices que puissiez faire au Roy de Nauarre, quant il aduiendroit qu'il auroit le dessus, & qu'il se verroit regner, ce que Dieu ne permette, vous ne pouuez esperer de luy la conseruation de vostre estat, ains plustost vous deuez vous tenir tout assuré qu'il vous despouilleroit de tout ce dont vous auez esté honoré par le deffunét Roy, ou bien vous feroit faire banqueroute à la Religiō Catholique: car c'est le propre de l'hereticque d'attirer en sa cordelle ceux, qui trop curieux luy prestēt l'oreille, ou les reietter arriere deluy. Par ainsi, Monsieur, ie vous prie de ne laisser escouler l'occasion fuyarde, qui maintenant vous presente sa cheueleure prenez la hardimēt tādiz qu'elle s'offre à vous, car elle passe en moins d'un tourne-main, & demeurāt chauue par derriere, sans se retourner que raremēt, nous laisse vn poignant repentir de ne l'auoir empoignee.

Que si vous auez enuie de vous rendre digne des estats, dignitez & grandeurs, dont on a vſé en vostre endroiſt. Faiſtes paroistre par effect, que Dieu vous a veritablement inspiré de son S. Esprit, en vous vnissant de volôté avec ceux, qui sont vnis avec vous de Foy & de Religion, & soyez le premier à faire la guerre à bon es- cient aux heretiques. Opposez vous de tout vostre pouuoir à leurs conseils peruers & damna- bles: résistez à leurs entreprises & machinatiōs : & vous ruez vifurement sur eux : perdez & dissipez leurs forces & assemblees illicites : par ce moyen vous regagnerez l'affectiō & bien-veil- lance du peuple, & adoucirez la hayne qu'à bon droiſt, peut estre, il vous a portee. Vous ferez plus: car vous seruirez en ce faisant à Dieu, à son Eglise, & au public. A Dieu (dis-je) qui vous à tant conferé de graces, qu'il semble qu'il ait eu soing de vous, comme le bon pere de son petit enfant, il vous a tant de fois preserué de peril eminent, (& de fresche memoire, de la coniura- tion de quelques particuliers d'Angoulesme.) Cuidez vous que ce soit pour ensanglanter voz mains au sang des membres de l'Eglise? ainsi n'aduienne, ne pensez pas que ce soit à autre in- tention, sinon pour vous faire son champion & vaisseau d'election, à la defence des bons, & ter- reur des meschans. Que si vous abusez de tant

de graces, il faut croire que le Seigneur, qui tout void, vous en sçaura bien chastier en sa fureur: combien que non si tost, toutesfois ie diray avec S. Augustin, que le retardement de la peine sera compesé, par la grauité du supplice. Ce n'est pas assez d'estre Catholicque, mais il en faut faire les œuures, il faut que la foy qui luit en nostre ame, agisse au dehors à l'edification du prochain, autrement (comme dit S. Iacques) telle foy est morte. Ce que nostre Dieu nous à donné à entendre, en la malediction qu'il a faicte du figuier, qui orné de belles fueilles estoit priué de fruiet. Je vous sembleray auoir esté par trop prolix en ce discours, ce q̃ ie recognois, à la charge que vous m'accorderez, que vn ample subiect, ne se peut declarer en peu de parolles, sans vn grand obscurcissement de la matiere. Et de peur de ne vous ennuyer d'auantage, ie finiray la presente, apres vous auoir aduertty, que de deux malheurs qui commencent à vous talonner, vous deuez eslire & choisir le moindre, fuir & euitier le plus grand. Dieu vous en face la grace le quel ie prie,

Monseigneur, vous donner la cognoissance de ce que deuez suyure pour le salut de vostre ame.

Vostre vrayement fidelle
seruiteur d'Elbene.

J'ay veu & leu ceste presente Epistre, & lettre escrite par Monsieur l'Abbé d'Elbene à d'Espernon, auquel ie n'ay trouué chose qui soit contre la Religion Catholique, Apostolicque & Romaine. Faict ce dixneufiesme iour de Septembre, mil cinq cens quatre vingts neuf.

Signé, DE LAVNOY.

A PARIS,

POUR GERARD VEDIE, demeurant rue du Bon-puits.

Avec Permission.



